

四庫全書

史部

欽定四庫全書

平定兩金川方略卷七十八

十月丁酉

上諭軍機大臣曰本日召見新授廣西右江鎮總兵敖成看其人尚結實據奏從前曾隨兆惠平定回部又在瞻對金川出兵於川省打仗情形自所熟悉因賞戴花翎并賞銀一百兩令即馳驛速赴軍營其應在何路帶兵進剿著阿桂酌量派委再前此陝甘貴州

等省俱有總兵缺出教成到營後即著於此項員缺  
內調補

己亥豐昇額奏言據盛英稟綽斯甲布故土司之  
子綽爾甲木燦雍中旺爾結同伊叔土舍江依進  
見該知府據稱土司已故我等雖幼諸事俱照土  
司在日出力辦事我等與金川雖係親戚並未使  
知不知金川從何得信近差頭人擢窩來到周叟  
卡外叫喊說你們土司病故按照土司規矩應差

人送緞挿旂並餽餽一盒以盡親情我守卡頭人不許過來擢窩等就將緞足餽餽放在卡外而去守卡頭人取來告知我等以金川詭計甚多想因天兵在此故意差人叫喊送禮使將軍大人疑我與金川往來此是欲施陷害之計現已分付各卡如金川再有人來送禮斷不許其過來還將其人設法擒獻我等叔姪弟兄同頭人百姓合為一心抵當得住不怕金川等語臣等查所稟各情並告知金

川私饋禮物尚屬輸誠統俟綽爾甲木燦雍中旺  
爾結來營時詳細教導酌量獎賞奏入

上諭軍機大臣曰據雍中旺爾結等所稟情節俱屬誠  
心恭順且其叔姪弟兄既稱合為一心則雍中旺爾  
結之應襲土司於情理更無可疑前已有旨令雍中  
旺爾結承襲並賞戴孔雀翎豐昇額可即遵旨辦理  
愈足使之感奮且可安番衆之心又據稟金川之土  
司病故差人叫喊送禮如其再有人來設法擒獻是

伊等感恩奉法實心出力甚屬可嘉著豐昇額等即傳朕旨將綽爾甲木燦雍中旺爾結及土舍江依各賞緞四疋以示獎勵並諭以伊等叔姪弟兄若果將金川差人擒獻必奏聞再予獎賞如能設法攻克金川地界並能誘縛逆酋即將爾等功績奏知大皇帝必更承受厚恩爾等惟當同心努力豐昇額等即遵照辦理

臣等謹案自金川不靖蠶食隣封各土司以其

鴟張日久恐致併吞共深仇憤幸而

天戈迅指為伊等除肘腋之患自皆實心感奮願効馳驅乃蒙我

皇上恩加靡已如工噶諾爾布歿後以雍中旺爾結等具稟情真詞懇誠心恭順即令承襲並賞戴花翎分賜緞疋用示寵嘉嗣後此路進兵從日旁宜喜一帶掃殄河西碉寨緯斯甲布兵隨征頗能用命實由待以至誠推心置腹遐邇番衆宜

無不感發天良始終効順也

同日豐昇額舒常又奏言查從噶克土司納木札爾卓克采土司甲噶爾布木俱係梭磨土婦卓爾瑪之姪自用兵以來因卓爾瑪時加教導約束均屬出力卓爾瑪自蒙

賞賜名號緞疋以後尤為感激圖報今其姪納木札爾甲噶爾布木已蒙

聖恩賞戴孔雀翎惟卓爾瑪之子名噶爾瑪斯丹年十



八歲甚屬鍾愛如蒙

恩亦賞戴孔雀翎則雜谷三土司一體邀

恩自必倍加出力於軍務益收實效奏入

上從之

壬寅

上諭軍機大臣曰明亮等奏寧夏鎮總兵張玉琦員缺請以汪騰龍代管等語汪騰龍人本平常且不能實在得力昨派往軍營之候補總兵敖成人甚可用即

應補授此缺至汪騰龍原係賞給叅將銜今所出有甘肅提標中營叅將員缺可即令其補授

癸卯豐昇額舒常奏言據守駐丹壩總兵五福差弁押送投出金川番人斑第斯嘉布一名臣等反

覆詳訊該番因畏罪投出尚屬情真然番性無定若留於營中需人照管且伊父母妻子弟兄均在賊巢諸多未便該番供內既有去歲春間投溫福軍營之彤錫係伊親兄之語查彤錫夫婦現在成

都臣等隨派弁兵押赴成都交與文綬收管又據該番供稱聽見土司與頭人商議派兵擡礮七尊并許多火藥鉛丸到達爾圖山梁要搶官兵礮卡營盤等語詢係得自耳聞其言雖不足深信然亦當密為防範如果賊人前來滋擾必痛加殲戮不使倖獲生還奏入

上諭軍機大臣曰豐昇額等奏金川投出番人斑第斯嘉布已另諭文綬將該番派員管押解京備訊矣閱

斑第斯嘉布供詞伊在金川所犯並非應死之罪何  
至舍其父母而逃且其得罪因與喀里寨番女有私  
該犯既欲脫避求投自應并攜其所私之女而來棄  
而不顧殊非情理且斑第斯嘉布即係金川番人非  
若各土兵被拘脫出者可比而所供又有聽見土司  
與頭人商議派兵擡砲到達爾圖山梁要搶官兵礮  
卡營盤之語其言過涉誇張金川賊衆詭詐多端安  
知非賊酋等擇彼處一無用之人遣令前來詭作投

降造此妄言傳布欲使我營中兵衆及土兵聞而驚懼或者彼為聲東擊西之計使我防範宜喜一路彼乃用力窺伺西南二路亦未可知雖經豐昇額等解赴成都但其初到營時訊錄供詞官兵到豈竟一無聞見或經傳說衆心不免疑猜所辦尚未妥密著傳諭各將軍等嗣後凡有自兩金川來投番犯俱喚進營盤嚴密訊供切勿宣洩致令我官兵土兵等聞知即有關軍務應行防備者一面密行辦理一面將該

押赴成都或竟解京候訊其訊供時所用通事亦當  
留其在營勿使與衆兵聚處談論即各土司所屬兵  
練自賊中脫出其供詞有及賊人如何抵禦官兵語  
涉張大者總須鎮靜留心防範其語亦當慎密勿令  
衆知仍將其人解省暫行管束俟大功告成再還各  
土司收管

乙巳阿桂色布騰巴爾珠爾奏言臣等現在剋日  
進兵一面收復美諾一面接勦金川此時兵力愈

盛分路愈多則奏功愈速若索倫兵丁全到尤為得濟但<sub>臣</sub>等至此業經兩月心急如焚不可再有

遲待總俟吉林兵至即可分路奮攻查吉林第三起於十月初一日始自成都進發約計五起當於十月末旬全數到營其南路亦須新調官兵始資分撥而南路程站較長是以<sub>臣</sub>等於吉林兵內先將在前之頭二起撥赴南路據文綬咨稱此項兵丁於九月二十八日及十月初一日始從省起程

亦約計於十月杪全抵南路至是時西路所需軍裝軍械等物大概均可齊全臣等現將月盡月初約可進攻之處先行密札知照豐昇額及明亮等從容預備一俟定期即速寄知務期同日進攻使賊酋首尾不能相顧以便迅速集事至分路兵數核計南路滿漢官兵共有一萬三千餘名今又益以新調官兵四千五百名又有屯練土兵共計已及二萬其綽斯甲布一路漢土官兵本有一萬四



五千名即節次攻勦不無傷損而合之近日調往  
三千名兵數亦應與從前相仿至臣等西路所有  
新舊滿漢屯土各兵除索倫一千五百名未到外  
共計二萬三千數百名是三路官兵併計六萬有  
餘再加以韋布什咱丹壩分撥防守及後路防護  
糧臺之兵為數幾至七萬聲勢已盛雖西路內南  
北兩山均須酌派大員繞路進攻其北山之別斯  
滿一路擬派兵八千名南山之本布爾桑岡擬派

兵九千名

臣

阿桂中路俟索倫及土兵全到可得

六七千名而兵數較多則進取自可較易是以湖

廣預備之三千兵恐其調赴軍營緩不濟急經臣

奏請暫停咨調總於收復美諾進搗金川時再遵

旨調來分撥應用奏入

上諭軍機大臣曰據阿桂奏稱收復美諾之事約於月  
盡月初可以進兵但阿桂等各路滿漢兵丁皆為進  
勦之用而後路更無餘兵防守賊酋狡惡多端且兩

金川相連路徑叢雜難保其不潛出邀襲我兵之後  
此事甚有關係不可不防前據明亮等奏訊據從金  
川脫出之小金川番人阿嘉供詞有聞得金川賊酋  
欲潛往巴旺布拉克底兩處報仇等語此兩處為翁  
古爾壘切近後路已諭令明亮等加意防範又昨據  
豐昇額等奏訊據來投之金川番人班第斯嘉布供  
詞有聞得金川土司頭人商量派兵擡礮到達爾圖  
山梁要搶官兵營卡賊酋若果注意在達爾圖滋擾

斷不肯預洩其事使我兵得聞此必逆賊為指東擊西之計陽稱往達爾圖而潛赴別斯滿等處抄截必須嚴密防守曾經諭知阿桂等一體留心至官兵進剿時賊衆若迎面而來則正利其出而失險我兵得以奮勇勦殲若彼潛匿我後則後路斷不可無兵控制前已諭調湖廣兵三千於進剿金川時留防後路並諭令富勒渾王進泰在兵帶彼駐守續據陳輝祖等奏稱各兵俱在宜昌暫駐赴川頗為便捷現在收

復小金川巴朗拉一帶後路即關緊要莫若此時即  
調赴軍營於防範更為得力現諭令陳輝祖派兵二  
千前赴日隆聽阿桂酌量應防要隘派撥防駐其一  
千派赴綽斯甲布交鄂寶酌派駐守著傳諭阿桂即  
行籌酌妥協一面辦理一面奏聞

同日阿桂又奏言

臣欽奉

諭旨查詢金川等處地圖竊查各土境地名最為繁瑣  
一山而各嶺異名一嶺而各碉寨又異名必須攻

至一處始能盡知各該處山峯碉寨之名從前所  
進地圖原不能全備今將兩金川舊圖所有地名  
及曾經攻勦於摺內奏明者均行添入以便查核  
至小金川地方以底木達布朗郭宗山形而論則  
小金川在金川之東南以美諾山形而論則小金  
川在金川之西南該處一帶山勢彎環而衆山迴  
合之中路遙橫斜者繚曲甚多隨步換形即一二  
十里之內已無定準前此軍營所進各圖只以大

概方向為憑是以未能悉合今臣令賡噶穆塔爾等當面指畫再三詳詢據云兩金川地方形勢實係如此再從前土弁土兵皆未有稱谷噶一路可以進兵者所以圖內未經列入昨土兵等雖言谷噶道路不甚艱難而賡噶又言該處山勢陡險坡礪甚大惟從凱立葉作固頂進攻易於得利是以此次繪圖已將谷噶凱立葉均行載入再查小金川之河東南一支發源於巴朗拉由資哩鄂克什

而西其東北一支發源於沙木角拉孟拜拉兩山之間由底木達布朗郭宗而西南流至明郭宗會合又西流經美諾達烏至章谷等處始與金川之河會合其金川之河發源於丹壩境外西北地方由緯斯甲布竹孜官寨一帶流入金川經勒烏圍噶拉依官寨之西南又經巴旺布拉克底及章布什咱境至明正章谷之甲木楚河而合於小金川之河下游歸入打箭爐河兩河皆係經流千萬萬



壑所匯波濤洶湧斷無可決可塞之法奏入報

聞

丁未文綬奏言查吉林兵二十內末起三百名已於十二月十一日到省現在辦理前赴西路其黑龍江兵頭起於初四日入川境十四日可抵成都即陸續分路前進外有續調楚兵三千計期應於黑龍江兵過竣後抵省正可接續通行所有經過川東一帶已飭地方妥速預備西路口內口外站夫

現足數用每起辦送兵五百名均可應付無悞至  
前此淮西路軍營咨取兵丁皮綿衣履鍋帳弓箭  
鳥鎗腰刀等項如數辦足運加軍營尚有多餘存  
留省城俟需用再行續解再查前淮軍營咨造劈  
山礮位已經解過西路三十八位緯斯甲布六位  
今又製成十五位以十二位送日隆以三位送宜  
喜又南路軍營咨辦大小火藥葫蘆一千個亦均  
辦就委弁解往至西路軍糧現已日就充裕并經

預為辦解交麪五萬觔以備裹帶昨又准督臣富勒渾咨飭辦灰麪二千石炒麪一百石鹽二千觔運營以供一萬八千兵十日裹帶之用等語臣思大兵進勦裹帶最為要需恐照常分派各屬辦運或有緩遲現飭軍需局即令附近州縣照運米之例招商趲辦勒限運往以資應用奏入報

聞

同日陳輝祖奏言竊查上年所派官兵前赴軍營

茲已年餘行間跋涉衣履不無敝舊接到軍營將  
領文稟據兵丁懇飭眷屬辦寄赴營並查現屆勁  
旅雲集壁壘整新之候先後調赴將士自宜一色  
贍給始於軍容益昭美盛但在楚省製給未能查  
悉確數且由各兵自備亦恐稽延惟成都地方商  
貨流通購辦尚易臣與撫臣梁國治籌酌每省各  
借給銀一萬三千兩足敷製辦即於次年正月起  
官作三季兵分四季扣清餘為伊等贍家之用一

面咨明四川督臣在成都購製衣履就近散給奏

入

上勅部速議具奏旋經戶部議奏應如所奏辦理

上從之

辛亥阿桂色布騰巴爾珠爾奏言前臣等具奏月

底俟吉林兵到即札寄豐昇額明亮等約期進兵

今副都統福珠禮領吉林第三隊兵於本月二十

二日已抵日隆其餘四隊官兵二十三、四等日可

以陸續到齊而派往南路之頭二隊吉林兵亦計  
日可到臣等公同商議自二十六日起撥派官兵  
前進定於二十九日相機勦擊並先札知豐昇額  
明亮等剋期進取再查滿洲索倫兵丁現自綿州  
前赴成都分四站行走臣等移咨文綬飭領兵員  
弁將四站改為兩站以期迅至軍營奏入  
上嘉之

同日阿桂又奏言查軍營米糧火藥等項固不可

稍缺亦無庸多積轉致滋累

臣

前在南路曾於四

五月間飭令按察使李世傑暫停輓運今蒙

皇上訓示精詳所有糧儲火藥銀兩賞需等項俟與該督等將每月供支應用之數酌量大概令其陸續運營其餘應於何處存貯悉心核定再行具

奏至於分防卡隘之法惟擇扼要地方派駐多兵以供控制賊番偶有伺間前來痛加截殺賊即不敢妄生窺伺

臣

前在當噶爾拉山梁皆如此辦理今

蒙

聖諭益當引昔領軍營為前車之鑑至現在踴揣進勦  
金川路逕必與各處聲氣相通而後路無虞方為  
妥善所以不敢輕率定議奏入

上諭軍機大臣曰阿桂所奏攻勦金川進兵道路其於  
凱立葉一處亦屬未定之詞今已進兵收復小金川  
自可以計日成功即須分路進勦金川其路徑不可  
不及早籌定著阿桂即速留心探訪核實密為酌辦



仍即具摺奏聞

同日明亮富德奏言竊韋布什咱地方東連章谷  
西控木池為臣明亮及豐昇額兩路軍營糧運所  
關最為緊要近據副將鄭國卿稟稱綽斯甲布遣  
頭人僧格塔達爾到甲魯告知聽聞金川要發兵  
來打不知實指何處我們到甲爾壟壩分付領兵  
頭人小心防範等語查甲魯正地迤南一帶毗連  
賊境現派漢土各兵扼其要隘並嚴飭鄭國卿實

力巡邏務在聲勢聯絡其迤北之甲爾壘壩距甲  
魯僅十餘里係綽斯甲布派兵據守現在密行知  
會豐昇額諒宜喜軍營得信更早自必密飭該土  
司一體加緊查察惟念副將鄭國卿在吉地統兵  
策應各路不足以資彈壓查自思紐以至章谷計  
程一百五十里而自章谷以至吉地復有一百五  
十里相隔甚遠指日收復小金川即須深入倘草  
布什咱遇有緊急軍情誠恐鞭長莫及且現奉

諭旨以進兵時加意範防後路勿使賊番窺伺滋擾自

當益加審慎茲撫臣鄂寶來赴軍營詢以宜喜糧

儲足支五月因擬暫留章谷查辦糧臺臣等思兩

路軍糧均係責成鄂寶經管且番地情形俱所熟

悉若留於章布什咱之丹東駐扎距覺木交八站

章谷七站而與吉地僅相去二站不惟兩處糧運

仍可往來經營即吉地以北設有賊番抄掠之事

亦可就近駕馭各處土司迅速調度況覺木交已

有總兵李時擴在彼駐守而自周叟以至三雜谷  
一路糧臺各有道府分段辦理且督臣富勒渾近  
駐桃關兼可督催似此一轉移間俾各路軍營均  
有重臣在後策應實足以壯聲援而臣等得一意  
進攻更無後顧之虞奏入

上諭軍機大臣曰草布什咱地方為明亮豐昇額軍營  
後路設有賊匪出而滋擾所關非細明亮等所籌亦  
是賊酋狡詐異常安知不以發兵來打之語恐嚇南

路土司而暗逞其聲東擊西之計但緯斯甲布頭人  
既以此語稟報自當先事嚴防丹東為翁古爾壘及  
宜喜適中之路鄂寶著在丹東駐扎策應但鄂寶帶  
兵無多於防勦尚未能得力前曾有旨派湖廣續調  
兵一千交鄂寶酌量分撥應用嗣應豐昇額等將來  
進勦需兵又諭令將此項楚兵亦赴宜喜今鄂寶到  
丹東後若果訪有賊番潛擾之事不可不添兵防禦  
又當務其所急即可一面通知阿桂豐昇額並行知

楚省帶兵之員仍將楚兵一千派赴丹東並令文綬  
妥速料理一面奏聞至覺木交地方前已派令顏希  
深在彼督辦糧務兼有李時擴統兵彈壓自己足資  
照料並著鄂寶將彼處應辦事宜札知顏希深等令  
其實力妥辦無稍疎虞

同日阿桂又奏言竊查霍耳諸部土司內德爾格  
忒為最大該處如章谷孔撒麻書綽窩等土司均  
信服德爾格忒之言如得該土司之心即可收衆

土司之用且該土司地方並未與兩金川接壤非  
如綽斯甲布明正木坪丹壩三雜谷等處恐被金  
川吞食因而派兵助勦冀除日後肘腋爭衡之患  
而三十六年兩金川滋事之始該土司即率同各  
土司懇派土兵其情實為恭順至南路站長夫少  
輸輓維艱今春該土司即派烏拉數千前來馱運  
以為各土司首倡尤見急公且於滇省夾爾塘紅  
教喇嘛爭殺一案經臣嚴飭之後自知理屈即不

敢更來賣訴亦屬深知畏懼該土司雖未帶領土  
兵親赴軍營出力然如三雜谷等土司亦未來營  
督戰今皆蒙

恩賞戴翎並

錫與嘉獎名號而該土司懇求未遂似不免獨抱向隅  
且土司等均以

天朝名器為榮正當藉此以為鼓舞之具指日進勦金  
川所有南路糧儲軍火取資馱運即可多省內地



夫役之煩可否將德爾格忒土司魯珠布甲木錯  
一併賞給花翎名號該土司自知

大皇帝赦其前愆重加

恩典自必倍為出力奏入

上諭內閣曰德爾格忒土司魯珠布甲木錯今春派出  
烏拉數千馱運軍糧具見急公著賞戴花翎並賞給  
信敬名號以示鼓勵

平定兩金川方略卷七十八

欽定四庫全書

史部

平定兩金川方略卷

七十九至  
八十二

員外郎<sub>臣</sub>顧宗泰覆勘

總校官原任侍講<sub>臣</sub>王燕緒

欽定四庫全書

平定兩金川方略卷六十九

十月壬子

上諭軍機大臣曰昨據明亮等奏綽斯甲布頭人告知  
副將鄭國卿有聞金川賊酋派兵來打之語已諭將  
軍等一體留心防範今思賊酋狡詐百出其云派兵  
往此一路必係指東擊西之詭計且賊番若果欲至  
綽斯甲布滋生事端則於侵擾木果木軍營時何難

別遣賊番窺伺宜喜等處彼時既未潛來豈有當此  
添兵進勦聲勢甚盛之時轉敢輕出嘗試況賊酋注  
意欲侵何路自必密為計議焉肯漏洩使鄰境得知  
其意不過布散此言使將軍等聞之派兵堵禦以分  
官兵之勢或聲言來窺正地一路却暗由巴朗拉翁  
古爾壘等處邀我西南兩路官兵之後則未可知賊  
番鬼蜮伎倆實為可恨今既聞有此言固不可不嚴  
密周防亦不可過於輕信轉以有用之兵置之無用

之地惟當於各軍營後路加意嚴防勿使得以乘隙  
窺擾則無論所言虛實皆可無虞即鄂寶至丹東後  
亦須不動聲色妥密部署不得稍涉張皇致為賊番  
輕視

同日鄂寶奏言竊<sub>臣</sub>前由丹東吉地一帶兼程前  
抵南路大營初八日回抵章谷查現貯大營並分  
存章谷等站以及資隆改運之米共二萬三千餘  
石按照官兵夫役人等核計雖可供至十一月下

旬但此路站遠途長今已時屆冬令冰雪載途輓  
輸不易且自省運米至爐城由爐城運章谷共須  
五十餘日即自雅州運至章谷之米亦須四十餘  
日方到所有派運米石此時即使全數起運尚恐  
或有斷續之虞若不上緊趕辦轉瞬之間舊糧用  
盡新糧不接所關實非淺鮮即如省中派辦分運  
爐城章谷米石原令九月內掃數運竣迄今尚未  
到站是派運之米不能尅日抵營已可概見若不

嚴立限期誠恐緩不濟急查此路長運米石均係  
由省城雅州兩處辦運自省至章谷計程三十八  
站自雅州至章谷計程三十一站臣現擬由雅州  
辦運者統限十一月十五日由省城辦運者統限  
十一月二十日掃數俱到章谷其餘各屬辦運爐  
城米石亦統限十一月內全數運完以備轉運倘  
限內不到即將承辦各員查叅示儆庶可迅速集  
事奏入

上諭軍機大臣曰糧糈關係軍行自當源源接運著傳諭富勒渾文綬通盤籌畫將每月應運軍營之米實需若干其留貯章谷以備續運者約需若干妥為酌定程限使站夫不致繁雜難行糧運不致稽遲貽悞方能兩得其益其如何妥立章程仍著該督等會摺覆奏

同日覺羅圖思德奏言竊臣接准文綬來咨官兵進勦所需鎗子原係黑鉛鑄造川省採辦恐不敷



接濟請於黔省存貯黑鉛內動撥四十萬斤解川  
應用伏查黔省黑鉛出產威寧州屬柞子廠向係  
由廠運至四川永寧縣設局委員收兌以供京楚  
鉛觔之用若將該局存貯黑鉛儘數運往較為迅  
速臣飛飭局員將現存局黑鉛先行撥運奏入報

聞

甲寅豐昇額舒常奏言據工噶諾爾布之妻策旺  
拉木遣其頭人溫布稟稱如今土司已故土婦是

金川女子兒子所娶又是金川之女雖係兩世姻親其實金川屢次圖害我們甚有仇隙惟求

大皇帝施恩令我得照土司在時一樣出力並求文武

父母官到官寨內有話轉達等語

臣等因其情詞

懇切隨委知府盛英遊擊李天貴前往該土婦稱

金川歷來殘害各土司不顧親情今蒙

大皇帝發兵勦滅與衆土司除害實沾

恩典但我土司無福已經身故我雖是金川之女斷不

肯瞻顧親情惟有教導兒子及衆頭人比土司在  
日更加出力還要令兒子雍中旺爾結綽爾甲木  
燦去見將軍大人當面發誓以表誠心該員等體  
察該土婦情詞實出至誠旋於十月十三日雍中  
旺爾結綽爾甲木燦來營進見據稱土司往例父  
親身故須念經四十九日畢後再行出門辦事因  
急欲瞻仰將軍大人是以弟兄同來其餘所稟情  
詞亦與該土婦無異並發誓堅心効力

臣

等諭以

爾等雖與金川有親久已被其圖害自不應稍存  
瞻顧今爾母子如此輸誠發誓更見爾等深明禍  
福實心效順金川平日殘害鄰封罪惡貫盈

大皇帝現發八旗勁旅十餘萬必要勦滅金川爾兄弟  
大小頭人務須同心出力不可稍被金川愚弄致  
干罪戾況逆首親戚中如布拉克底亦與金川兩  
重親戚現在實心効力爾父工噶諾爾布在日深  
明大義出兵助勦

大皇帝屢次加恩爾等果如汝父出力自然加倍受恩

臣等曉諭之後察看伊等情形實屬歡忭感激隨  
加優賞以堅其效順之誠奏入

上諭軍機大臣曰豐昇額等奏綽斯甲布情形一摺如  
此甚好仍著差盛英到彼告以將軍已將爾夫婦之  
事奏聞蒙頒諭旨以爾夫婦誠心恭順大皇帝深為  
嘉慰如梭磨土婦卓爾瑪始終恭順并駕馭其姪卓  
克采土司甲噶爾布木從噶克土司納木扎爾等實

心出力曾賞給名號緞疋三雜谷因此更加奮勉今  
爾土婦策旺拉木教管爾子竭誠効用較之卓爾瑪  
之駕馭伊姪尤為切要特賞爾貞義名號并綵緞四  
疋用示獎勵爾更當盡心督率爾子等竭誠報効以  
繼爾父工噶諾爾布之志如能設法勸平金川擒獲  
賊酋爾母子必邀大皇帝格外鴻恩又據奏稱雍中  
旺爾結綽爾甲木燂來營進見看此情形則雍中旺  
爾結之應行襲職更無可疑雍中旺爾結既係雍土

婦之子且為番衆所歸向尤當急令承襲土職以堅其心如此施恩伊母子自必更加感激至其襲職之處屢次所降諭旨甚明豐昇額等即可遵照辦理并諭阿桂知之

十一月丁巳富勒渾文綬奏言

臣等仰蒙

諭旨垂詢以現在各項官兵每月實需鹽菜口糧約計

若干萬兩

臣

等查川省各路舊存官兵及新添滿

漢屯土之兵共七萬四千九百八十一名其新派

京城東三省及駐防兵九千應得分例較多於綠營今通計官兵鹽菜月餉糧米及臺站一切夫役工食口糧並驛站夫馬工料每月約需銀九十八萬餘兩其餘一應雜費數多寡無定通計每月實約需銀一百餘萬兩至軍需各款具有成規惟糧隨軍運送遠近不同其臺站夫馬等項增減移撤隨時酌辦如目下應付兵差站夫俱係較常寬餘備用將來兵行既竣自可照舊酌減而大兵采



入即須添站增夫此項酌減之夫正可用供調撥  
其餘應隨時酌量變通者臣等會同商確務期核  
實妥辦奏入報

聞

已未

上諭內閣曰前令總兵教成馳赴四川軍營嗣因寧夏  
鎮總兵缺出即降旨令教成補授今據阿桂奏稱貴  
州官兵在軍營者較多若令教成補授貴州鎮遠鎮

管領黔兵更為得力教成著照所請調補鎮遠鎮總兵其寧夏鎮總兵員缺仍著阿桂於軍營出力人員內另行揀員奏補

同日阿桂色布騰巴爾珠爾奏言查賊首索諾木本屬闇弱童頑一切奸謀多係伊兄莎羅奔岡達克及丹巴沃咱爾為主使而此時僧格桑如孤豚腐鼠已成無用之人誠如

聖諭若能擒此二人既以剪賊首羽翼且可寒賊人之

膽<sub>臣</sub>等剋日進兵將抵美諾時一面攻打一面設

伏堵截務期悉行弋獲至賊人所集碉卡多在陡

坎山崖之上可以兩三面圍攻者本少<sub>臣</sub>阿桂向

來偶遇有覓路繞攻之處俱派出矯健弁員帶領

土兵前往今既有吉林索倫勁旅履險登山皆能

奮勇如遇賊衆負隅可以遠越即派索倫等兵與

土兵同往並派普爾普成果等統率進攻自更為

得力查索倫兵二千名<sub>臣</sub>等已奏明於前起內酌

派五百名令赴南路今遵

旨又行知副都統倭昇額署川督

臣

文綬將末起三百

名派赴綽斯甲布軍營均令由京派出原領隊之  
侍衛等帶往其餘應赴西路之索倫兵一千二百  
名現在陸續可抵成都約於十一月初旬內全數  
到營奏入

上嘉之

同日阿桂色布騰巴爾珠爾奏言竊

臣

等密札豐

昇額明亮等已定期於本月二十九日分路進兵  
收復但<sub>臣</sub>等西路官兵尤為克復小金川正路必  
須計出萬全始可一舉成功今查探資哩河北之  
色布色爾美美卡河南之阿喀木雅鄂克什路頂  
宗等處俱係我兵進攻要口現有賊番佔據若僅  
恃兵力進攻道路窄險一時難於得手須從南北  
山梁抄越前往斷賊歸路前後夾攻方為有益<sub>臣</sub>  
等詳加商議若從達木巴宗超越南山本布爾桑

岡奪佔貢噶山梁其間路途紆遠山險箐深賊番知覺恐有攔截之虞至北山之色布色爾地方雖亦有賊番碉卡且山勢甚高路途較遠但其地稍寬箐林亦少查達木巴宗之北有路可通斯達克拉阿噶爾布里碩藏噶爾莫如派兵前往不帶帳房不舉煙火突然掩擊若能攻據此三處一路由別斯滿攻底木達布朗郭宗一路攻取兜烏可以夾攻鄂克什明郭宗從此順帛噶爾角克山梁即

可直抵美諾至美美卡一處更為賊首要地從山  
溝而北可以通別斯滿而西逼鄂克什官寨且與  
南山之木蘭埧遙相對峙山形險絕難以力攻臣  
擬是時在資哩北山下乘其不備派兵直搶美美  
卡或於美美卡東邊之東瑪色爾渠佔地駐扎則  
前往碩藏噶爾之兵下至別斯滿時官兵聯絡接  
應色布色爾等處之賊自不能久據臣等商議已  
定即派兵二千餘名駐扎色布色爾對面山梁以

防賊番斷我後路其阿噶爾布里等處令海蘭察  
常青普爾普保寧伊達禮常保佳等帶兵八千餘  
名分撥前往又派兵三千名令富興阿什哈達特  
成額等視中路官兵進攻資哩時即帶兵自資哩  
北山下直取美美卡等處又派兵四千餘名令成  
德等帶領奪佔資哩南山臣色布騰巴爾珠爾同  
臣阿桂帶同領隊大臣並兵五千餘名從中路攻  
勦資哩並為各路接應西路如此分進而南路與



綽斯甲布兩路之兵同時進發以分金川賊酋之勢賊番即多詭譎亦斷不能分頭抵禦

同日阿桂又奏言查綽斯甲布頭人松乃其父為

金川所殺

臣

在南路時據知府盛英守備張芝元

及宋元俊皆有此語去年八月間霍爾章谷土司

因挾綽斯甲布搶其烏拉之嫌曾將松乃拘留

臣

是時正辦綽斯甲布一路進兵因飭將升等曉諭

該土司將松乃放出令往宜喜軍營帶領土兵以

資其力昨豐昇額等來札稱松乃之兄從前亦為金川所殺是其仇恨甚深實為有據松乃現在帶兵攻勦荷蒙

皇上天恩賞給翎枝并賞銀兩自必更當踴躍自効至此次金川賊酋實因誘脅降番各反其地是以後路皆多梗阻將來收復美諾進勦金川其美諾以南各寨前已洗勦殆盡而美諾東北一帶小金川寨落尚多處處嚴防不獨多分兵力恐或有照料

不到之處似難俟勦滅金川後一併籌辦伏思此等已降復叛之番原應盡加誅戮俾無噍類但恐金川賊衆益以堅其死守之心又不得不權宜辦理然其大寨堅碕斷不可留而附近金川人戶亦當別籌移置所遺碕寨並應概行拆毀使賊無勾結之端憑藉之地則後路方可無虞均奏入

上諭軍機大臣曰阿桂等奏分路派兵勦復小金川一招所辦甚好佇盼捷音此次添有滿洲勁旅聲勢甚

盛而阿桂等派撥帶兵之處亦甚合宜看來收復美諾自屬易事況小金川番衆與金川離心之處傳聞已屢乃情理所必然今見大兵進攻且隨路遣人招致其望風來降亦可意料而得惟是此等降番皆係曾經叛逆之犯於法本無可恕但處之過嚴不但小金川諸番聞而生畏前途未必復肯來降且金川賊衆聞之更不敢前來投順益以堅其死守之心自不可不權宜辦理第阿桂所稱其大寨堅礮斷不可留

而附近金川人戶亦當別籌移置所遺碉寨並應概  
行拆毀使賊無憑藉之地等語所見固是但拆毀碉  
寨殊非易事既恐輕分兵力且不免稍稽時日即別  
籌移置亦非其願況前此宜喜軍營以弁兵七八人  
管解廢噶一人尚致脫逃今小金川番衆如果來降  
數必不少當得弁兵幾何方敷押解設或中途又致  
竄逃更復成何事體朕意莫若且不動聲色照常安  
插即有必須正法者總俟兩金川平定後再行分別

籌辦庶為萬安然情形隨時不同惟在阿桂等審度  
機宜妥為辦理或有可疑之地可疑之人不得不辦  
者又不可拘泥此旨也且從前賊衆潛出美卧溝至  
底木達等處招誘降番復叛滋擾木果木軍營之事  
皆由溫福妄自尊大不聽人言不恤士卒又一切全  
無料理致令衆心生怨而劉秉恬董天弼於防閑後  
路又復貽誤致賊番得以肆其猖獗今各路將軍等  
諸事妥為調度賊首自無隙可乘而後路諭令富勒

渾王進泰統兵駐守以劉秉恬董天弼為戒加意防範自不致稍有疎虞今進兵已五六日深為盼望一有喜音即隨時迅速奏聞

同日郝碩劉秉恬奏言竊照將軍阿桂現擬分兵三路直取小金川巢穴因裹帶米糧勢須炊爨誠恐賊番知覺預備曾飭令地方官備辦灰麪十餘萬斤作為乾餼以便裹帶但現在師期已屆而前項備辦之麪到營者止有三萬餘斤其餘一時尚

難驟至不得不設法籌辦臣等於附近軍營之達木巴宗木坪日隆等處探訪商販麪斤價值較之由內地備辦運營腳價其數有減無浮隨飭建昌道白瀛即就各該處上緊購買數日以來已得炭麪五萬餘斤加以炒米搭配足敷裹帶之用至此次進勦惟北山一帶之兵為數較多山路較遠現止裹帶十日之糧若不預為籌畫恐一時有需接濟未能速得信息所關匪細臣等現擬專差尾隨



前進查勘道路情形一面計算兵數預將夫糧派  
辦停妥俟差往之人一經回報有應需接濟之處  
立時如數運往自可無虞缺乏奏入報

聞

庚申明亮富德奏言

臣

等恭奉

上諭進兵吉期定於本月二十七二十九兩日酌量選  
用正在密為布置旋准將軍阿桂知會西路已定  
於二十九日派兵進攻而南路吉林兵五百名亦

於二十及二十二日先後到營<sub>臣</sub>等查沿河兩面  
碉卡連綿若僅由此兩路發兵賊畚合力死守誠  
恐未盡制勝之宜<sub>臣</sub>等公同商議河北墨壘溝一  
路派令奎林帶兵二千餘名由泥壘下壓得里山  
梁碉卡一面又分兵順山而下斜攻日寨<sub>臣</sub>富德  
帶兵三千餘名由真登梅列舊卡前進酌留官兵  
扼住賊畚抄截之路即由山巔壓取日寨及扎覺  
木等處至兩路會合時酌分數路並下勢若建瓴

自易於得手臣明亮帶兵由思紐前敵亦分三路

其一路順河楊威牽掣賊番使難他顧其二路皆  
向上仰攻接應奎林下壓得里之兵以便乘勝前  
進至河南拉約陡壁峭立下至山半地名得布甲  
碉寨之下僅有一線細路非用土兵不能爬越而  
上現撥挑屯土兵二百名先於附近藏匿候至夜  
深潛往襲取仍派三寶帶領滿漢兵一千名伏於  
翁古爾壟溝內以五百名往山後作進攻之勢牽

掣各卡賊兵以五百名留俟土兵攻克得布甲前  
往策應似此河南河北數路發兵賊番斷無從測  
我虛實再墨壘溝兩起官兵必須晝伏夜行庶免  
賊番窺見今擇於二十五日黑夜起程諭令各兵  
裹帶七日口糧其餘密飭臬司李世傑安臺接運  
奏入

上嘉之

平定兩金川方畧卷七十九

欽定四庫全書

平定兩金川方略卷八十

十一月丁卯阿桂色布騰巴爾珠爾奏言臣等於  
十月二十七日子刻派海蘭察常青等帶兵八千  
餘名由達木巴宗北山取道前攻斯達克拉阿噶  
爾布里碩藏噶爾三處以壓別斯滿其北山一路  
派富興烏什哈達等帶兵三千餘名前往攻搶木  
拉斯底普爾瑪美美卡等處其南山一路派成德

等帶兵四千餘名從上繞進壓取阿喀木雅此兩路官兵均於二十九日子刻潛進至臣等中路內復分兩路派額森特等帶兵一千名由資哩之北山根進攻海祿納木札等帶兵一千名由資哩之南山下進攻亦均於二十九日子刻潛進潛密端進臣阿桂色布騰巴爾珠爾積福福康安福珠履帶兵分頭接應查資哩山下有橋一座為兵行往來要路賊番築卡拒守寅刻額森特等督兵進攻

賊番放鎗抵禦將近橋卡賊益盡力拒守我兵奮  
勇衝撲賊不能支四散奔潰官兵追殺過半即將  
橋梁奪佔其北山下路富興等赴額森特奪橋之  
際帶兵上山分佔木底斯底以及普爾瑪等處而  
海祿亦帶兵由南山往攻阿喀木雅東溝之碉額  
森特既得橋座即帶兵前往合攻而是時成德統  
從南山而下亦壓至阿喀木雅東溝三路官兵會  
合奮攻該處碉座本屬堅大又在山崖之上極為

陡險賊番拒守甚力官兵不顧鎗石進撲數次賊  
於碉內鎗石交下攻至亥刻賊見勢難抵禦乘夜  
出碉逃竄官兵追趕下坡鎗箭齊發殲斃甚多是  
日富興烏什哈達等帶兵上至普爾瑪地方督率  
侍衛將弁等分佔美美卡東瑪色爾渠等處均經  
攻克亦有殺獲其海蘭察等北山之兵於二十九  
日申酉間分為二路進攻將斯達克拉阿噶爾布  
里碩藏噶爾山梁同時攻克佔據而色布色爾之



賊見勢已孤望風驚潰該處係在別斯滿之巔下  
壓極為得勢據報現在迅速籌辦是夜南山額森  
特海祿等隊內官兵因鏖戰一日夜暫令歇息至  
三十日五更進攻阿喀木雅山上大碉官兵四面  
奮撲攀附而上賊番駭竄旋將山梁一帶碉卡全  
行攻克額森特等乘勝直取木蘭堪賊俱奔潰隨  
即督兵直攻鄂克什官寨賊見我兵勇銳異常一  
面放鎗迎敵一面四散竄逃殺戮甚多掣獲活口

二名派兵將官寨據住其各處奔竄賊番均遁入  
路頂宗聚首臣等統率官兵乘此銳氣現在督令  
力攻以期即克臣等查此一路內如阿喀木雅美  
美卡木蘭堪形勢均為絕險上年攻打至五六月  
之久始行克取今此數月均有賊番拒守且已早  
為預備乃於兩日之間盡行克復此皆仰荷

皇上調撥滿洲勁旅暨各省精兵

指示機宜分頭並舉俾賊首左支右絀首尾不顧是以

迅速摧破此次各隊官兵不獨滿兵奮勇絕倫即  
新到綠營官兵均倍常出力而舊兵亦奮勉爭先  
臣等欣仗

威福自可乘勝直入

同日明亮奏言竊臣等謹遵

欽定吉期西南兩路會同進勦茲於二十五日富德奎  
林等所帶官兵均從黑龍溝先後進發至二十九  
日子刻三寶所帶兵練亦齊抵沿河山下相次前

進賊番施放鎗石不絕臣在河北思紐所帶三路官兵亦令分頭並進攻取得里並山梁碉卡賊番漸聚漸多皆於兩面山險要之處竭力死守臣候至夜半督率各兵分路潛往猝然攀躡而上乘其倉皇失據時即將得里碉寨全行攻奪正當督兵前進而富德已攻得喇嘛寺日寨繞出得里之前兩軍同時會合勇氣倍加一路追殺直至策爾丹色木該處賊番旋即潰竄其得里最高山頂賊碉

當日亦為奎林攻獲至三寶等往攻得甲布之兵  
原令牽綴為河北聲援使賊人不能隔河放鎗維  
時望見河北克捷無不覓路而登漸至山半勢亦  
不能再退當即併力直前爭自殺賊臣又添派舒  
景安帶兵合力賊番不能抵禦盡棄碉卡而逃統  
計河南之得甲布河北之喇嘛寺得里兩面山梁  
日寨策爾丹色木盡行攻克現當潰敗逃散之餘  
臣飛調夫糧接濟並將所得要隘派兵防範鼓勵

官兵連夜前行即期埽穴奏入

上諭內閣曰阿桂明亮奏稱西南兩路官兵均於十月  
二十七八九等日分路進勦西路已盡克資哩南北  
山梁美美卡木蘭堪並收復鄂克什官寨南路已克  
得甲布喇嘛寺得里兩面山梁及日寨策爾丹色木  
且現在鼓勵官兵乘勝前進等語收復小金川其勢  
較易朕已久經料及但此次甫經進兵數日之間即  
連得賊酋險要碉卡殺賊甚衆覽奏深為嘉悅皆將

軍叅贊調度董率有方西路領隊大臣額森特於攻  
勦資哩木闌琪時較衆倍加奮勉南路之領隊大臣  
奎林攻克得里賊碉亦甚勇銳均着交部議叙其在  
事出力之將領弁兵並着阿桂明亮等查明咨部一  
併議叙其中有勇勉超羣者查明專摺奏聞候朕量  
加優獎

上又諭軍機大臣曰據阿桂明亮等奏到兩路同時進  
勦連克賊酋碉卡阿桂已抵路頂宗明亮已過策爾

丹色木距美諾均不遠自可即望捷音此次進兵以  
來兩日之間連得賊酋險要碉卡如摧枯拉朽固由  
添派滿洲勁旅勇往直前綠營兵亦皆效法知勉是  
以所向克捷但究覺得之太易恐賊酋暗藏詭計或  
讓我兵直進在後抄截不可不防在官兵現俱乘勝  
而進自當鼓其銳氣使益奮勇成功所謂兵貴先聲  
亦董勸將士之道至帶兵之將軍叅贊領隊等遇事  
當倍加慎重不可因連次得勝稍存得意自滿之心



滿招損謙受益古訓昭垂將軍等各宜深體此意凡  
進兵後路加意嚴防慎之又慎方為妥善就現在情  
形而論官兵乘勝深入實有席捲之勢其於克復美  
諾布朗郭宗等處自非難事即克日集勲亦不足言  
喜惟能將莎羅奔岡達克丹巴沃禰爾及七圖安都  
爾等一併設法擒獲朕方喜慰蓋岡達克丹巴沃禰  
爾乃索諾木所恃主謀得力之人而七圖安都爾向  
為僧格桑管事一切狡惡可惡之處皆彼黨助此三

人斷不可輕宥即或岡達克丹巴沃襟爾二人未必  
果在美諾或聞官兵勢盛仍復竄回皆不可定而七  
圖安都爾為小金川舊賊目自必在美諾等處率衆  
拒守阿桂明亮等均當一體留心若能將賊酋賊目  
等拏獲即速派妥幹之員解京嚴審辦理所有將軍  
等此次統兵調度有方深為嘉慰阿桂明亮着各賞  
大荷包一對小荷包四個色布騰巴爾珠爾富德各  
賞大荷包一對小荷包三個海蘭察常青奎林各賞

小荷包三個普爾普烏什哈達額森特特成額海祿  
富興三寶舒景安各賞小荷包二個以示獎勵至豐  
昇額等一路雖係牽綴之兵其進兵以後情形若何  
亦着迅即具奏

臣等謹按行軍之要貴乎先事預之故聖人言  
好謀而成兵法言多算制勝我

皇上於此次進兵之先調集滿洲勁旅并各省精兵  
指示機宜纖悉備盡臣阿桂等謹遵

欽定吉期董率西南兩路官軍同時奮勦於三日內西路則盡克資哩美美卡木開坝等處並收復鄂克官寨南路則攻克得甲布喇嘛寺得里山梁及日寨策爾丹色木等處攻堅奪隘賊衆無不披靡凡爾時克敵情形皆於月前

廟算先經籌及是以奉

命掃殄所向克捷乃

聖諭又慮將領等稍存得意

諄諄訓誡以滿招損謙受益遇事倍加慎重此利用行  
師鳴謙所以貞吉而

聖人臨事戒懼先後同符也

同日富勒渾王進奏言竊臣富勒渾從桃關起  
程二十五日已到日隆軍營稽查糧米軍火各項  
已俱充足所需灰麵亦足敷用將軍阿桂現統官  
兵分為三路進勒查三路中惟北梁一路程站較  
遠官兵深入畏帶之外接濟糧運軍火各事宜及

早籌畫亦經白瀛將附近各站人夫抽撥備用均可不致貽誤臣富勒渾與臣王進泰將日隆等處要隘均撥兵弁防守惟達木巴宗距日隆雖只五六十里與賊境相通處甚多且為存貯軍糧後路巡防尤貴嚴密臣等查有前派卧龍關以內護守糧臺之民壯一百五十餘名現在大兵雲集卧龍關一帶係附近口內地方毋令多兵防駐擬將此項壯兵調至日隆協同兵弁護守臣王進泰暫駐

日隆稽查彈壓臣富勒渾即赴達木巴宗相機籌  
應奏入

上嘉之

同日阿桂富勒渾奏言臣等前奉

諭旨令桂林馳驛前往四川軍營辦理運糧諸務茲桂  
林於十月二十七日來抵軍營臣等查鄂克什一  
路現有臣富勒渾同按察司郝碩及劉秉恬等督  
率糧員隨時籌辦自可不憂貽誤其綽斯甲布一

路糧儲尚為充裕近復奉

旨派布政使顏希深隨同鄂寶辦理亦可源源接續惟  
南路站長夫少只有按察使李世傑一人不無顧  
此失彼而臣富勒渾與鄂寶相離遠時有鞭長  
不及之患查桂林前在南路統兵此一帶道路情  
形最為諳習若令桂林率同李世傑專辦南路軍  
糧而令鄂寶專辦綽斯甲布丹堪軍儲更為得力  
奏入報



聞

己巳阿桂色布騰巴爾珠爾奏言臣等自十月二十九日發兵即由資哩攻至鄂克什所有南北兩山礮卡全行克獲十一月初一日大兵已進抵路頂宗但路頂宗一處峯形陡峻三面懸崖峭壁僅有沿溪一綫細路螺旋而上陡逕滑沙往往不能駐足地形實為險絕且資哩南北兩山等處擊敗賊衆盡皆聚積於此悉力固守並且用砲抵敵以

逞螳臂之計若照常攻打不免多需時日自當于  
醜徒喪膽之時一鼓而登勢更易於摧敗因令額  
森特等帶兵由路頂宗遠過南山從上下壓納木  
札等帶兵由正路進攻海祿等帶兵由山腿向山  
仰攻乘夜潛派官兵毫無影響至初二日子刻侍  
衛將弁等督同滿漢屯土等兵於至險至峭之地  
一齊攀越頂趾相接騰凌直上賊番尚無知者經  
官兵攀牆躍入突然奮殺賊番放鎗不及均用亂

石拋打我兵合力進射斃賊三十餘人滾崖跌死者甚衆其餘四散竄逃奪獲砲位烏鎗長矛腰刀等物甚多當將路頂宗佔據至海蘭察在色布色爾等處亦將所帶之兵分為三路於初一日下山衝壓旋將別斯滿大小各寨十餘處全行攻獲普爾普帶兵由別斯滿東南下壓山梁碉卡富興等所帶之兵於初一日由班東仰攻兜烏之靠南山峯該處山勢險陡賊人早有提防奮力進攻未能

得手初二日黎明復督官兵進撲賊衆已過兜烏而西海蘭察之兵亦上兜烏山梁聲勢甚大靠南山峯之賊旋行奔散富興等即合力往壓帛噶爾角克等寨其額森特等一克路頂宗即督兵直攻明郭宗賊見木波帛噶爾角克一帶已有官兵分布勢難支禦分頭竄逸官兵追趕亦有殺死者即將碉寨搶括者搜獲寨內所藏糧米甚多惟是官兵自二十九日以來五晝五夜追趕截殺分頭搶

佔碉寨又所得各處及隘口地方均須留兵駐守  
比至攻克明郭宗所存不過二千餘人臣等酌調  
官兵添助聲勢即令鄂森特等由南山梁上進取  
美諾海祿等由明郭宗下路合攻額森特等比至  
南山梁上時已昏黑遂先分兵截取美諾喇嘛寺  
佔據形勢畧齊兵力即攻撲美諾官寨而海祿之  
兵又從下路統至賊衆驚惶乘夜奔竄官兵一面  
趕殺一面入據官寨共搶獲大砲四尊劈山砲八

尊米糧一百餘石詢據來投番人供稱七圖安都爾見大兵已上山梁留兵看守美諾隻身逃去不知現往何處等語臣等遣人飛探南路官兵尚無信息隨復派兵往接至海蘭察處本有兵八千名又有富興等帶兵二千餘名從帛噶爾角克碩接續攻勦底木達布朗郭宗等處亦必勢如破竹此時金川賊酋兄弟聞之必深震懼而各土司亦可堅其助順之志

同日豐昇額舒常奏言

臣欽奉

諭旨於本月二十九日進兵

臣

等悉心相度宜喜日旁

之間山名沙埧離爾圖山止隔一溝此山梁以上

亦有賊人碉卡若出其不意突然進撲可望得手

當派領隊五岱等侍衛分隊前進二十八日黎明

五岱等帶兵直上沙埧山巔徑抵賊碉之下賊番

驚覺放鎗擲石而兵丁奮勇爭先賊番驚潰分逃

官兵攻克碉卡各一座此外尚有數處碉卡賊人

在內放鎗抵禦臣等細看情形其地樹木叢密道路窄狹離宜喜軍營甚遠且此處無從取水非可久留隨將所得碉卡折毀撤回行至十餘里間忽有賊二百餘從樹林中突出衝截經副都統書麟等督率滿洲官兵鎗箭齊發殺賊多人餘皆四散奔竄此次官員兵丁俱各奮勉而綽斯甲布人等比工噶諾爾布在時倍為勇往臣等惟期進克要隘以揚我武均奏入



上諭內閣曰阿桂等奏到初二二等日連克路頂宗明郭宗等處現已克復美諾並收到別思滿兜烏帛噶爾各克碉各情形收復小金川之易朕原早已料及第官兵等能於一二日內連次克復美諾等處勦殺多人並搶獲砲位米糧寔屬迅速所有將軍阿桂叅贊色布騰巴爾珠爾俱着交部議叙其在事之將弁兵丁等均屬出力奮勉並著阿桂等查明咨部議叙如有起衆奮勇者即行具摺奏聞候朕另降諭旨又據

豐昇額等奏從宜喜覓路攻奪沙堪山梁碉卡殺賊奪械等語宜喜一路此原係牽綴賊勢于今官兵等同日進攻即能克碉殺賊亦屬出力豐昇額等及在事將弁兵丁等俱著一併交部議叙

上又諭內閣曰此次進兵攻取美諾等處副都統額森特督兵勇往甚屬可嘉著加恩特授護軍統領又署總兵海祿攻勦明郭宗奮勉出力着加恩定授固原鎮總兵以示獎勵

上諭軍機大臣曰阿桂等奏連克路頂宗明郭宗等處  
現已克復美諾業經降旨交部議叙并諭將攻勦路  
頂宗明郭宗直上官兵從優議叙其何人首先躍入  
賊碉亦令查明具奏候朕另降諭旨至官兵自進攻  
以來僅五晝夜即克復美諾處可謂迅速矣但據奏  
七圖安都爾於官兵甫抵明郭宗即行逃竄不知所  
往等語七圖安都爾為僧格桑用事頭人所有小金  
川狡謀惡計多出於彼實為可恨自今揣力不能支

又不肯束手就縛自必仍往金川恐未能及時追  
獲看來岡達克丹巴沃禱爾料我必不歇手自然進  
兵攻勦遂將美諾等處交付七圖安都爾二人先回  
金川今七圖安都爾又復竄去可惜失一好機會是  
以雖聞捷奏不能慰懷也惟是此次進攻因添有滿  
洲勁旅士氣奮興軍威大振所向克捷以此先聲足  
令賊衆聞而膽落稍為可恃今阿桂已差人往南路  
通知明亮等會兵想克復美諾之後僧格宗一帶賊

人必皆望風潰去明亮等自更易於直進其底未達  
布朗郭宗等處亦無難即時收復阿桂當一面酌量  
小金川善後事宜及派兵防禦後路糧臺諸務交富  
勒渾王進泰妥為經理阿桂明亮即一面帶兵分路  
攻勦金川乘將士新勝銳氣鼓勇直前且當賊人未  
及守拒之時攻其無備成功更為利便阿桂等當努  
力為之佇聽捷音但於何路進攻較妥阿桂尚未籌  
定朕意美卧溝一路為兩金川要隘賊酋未必於此

堵截或可從此而進使之猝不及防又今年夏間賊至木果木軍營後路滋擾並非自昔嶺一面而來其由金川潛出之路即可為我兵密進之路亦賊所不能預備者若用此兩路兼進較之當噶爾拉等舊路尤為妥速著傳諭阿桂將是否可行之處即速妥酌奏聞又豐昇額等攻得沙壩山梁賊碉一處因難於駐守隨即撤回宜喜一路究難深入豐昇額等在彼尚未知小金川捷報今阿桂已將美諾等處全行克

復即當進兵攻勦金川自必寄扎約會並進豐昇額  
此時當遵前旨率同書麟五岱彰霸等帶領官兵馳  
往丹琪相機攻勦其宜喜一路留舒常在彼並賞賞  
阿桂色布騰巴爾珠爾額森特海祿成德等御用黑  
狐冠各一項俟其到時祇領並聞鄂克什等處之便  
御製紀事詩一章書賜阿桂亦隨報發往並賞豐昇  
額舒常小荷包各四個書麟馬彪五岱彰霸伍爾圖  
納遜小荷包各二個將此傳諭知之

同日郝碩劉秉恬奏言竊臣等前因我兵分路掩襲賊巢惟北山梁道路較遠臣等督率糧員業於初一日運過米一百石本日又運米一百十餘石以兵數核計糧數並扣算道路之遠近背夫往返約須幾日陸續運送諒不致有缺乏至中路之兵現由鄂克什前進日內即可攻克路頂宗長驅直入軍糧軍火均關緊要急須添站安夫臣等因現有之夫尚不敷用若候內地僱到必致悞事業已



尚差前往鄧生隆拉岩洞卧龍關等站先及早抽  
調夫二百名以資急須臣等仍不時往返催查趕  
緊辦理奏入報

聞

同日郝碩劉秉恬又奏言竊照大兵攻得路頂宗  
明郭宗並克復美諾其海蘭察等已由北山梁直  
抵帛噶爾角克碯我兵乘勝直前行走迅速軍糧  
尤宜趕緊辦理查達木巴宗現存米一萬餘石該

處距美諾約有百餘里按照道路遠近運糧章程  
中間應安三站臣與督臣富勒渾等抽調之夫俟  
一二日內到齊應即照舊安設以資滾運現在未  
安站時先於達木巴宗多撥人夫並催覓貿易人  
等趕運美諾其日隆達木巴宗兩處運到商米亦  
按站給與價值令其一體運至以濟軍中之食至  
海蘭察等所帶官兵糧運前此尚須取道普爾瑪  
山梁今美諾等處業經攻克而海蘭察等之兵已

抵帛噶爾角克碣沿途既無阻隔此路官兵之糧  
即由明郭宗美諾運往較為平坦近便

同日富勒渾奏言將軍阿桂克復美諾移營前往  
策應臣查大兵分路進勦乘勝長驅接濟糧運尤  
為緊急臣隨飛飭達木巴宗站員派撥夫役先行  
背米七八百石專差管押分頭趕送中路及南北  
兩山梁以濟急需現在仍源源接運均可不致遲  
悞至美諾既經收復必須安設糧臺臣現督同健

昌道白瀛調派站員分撥夫役挨次安為妥設務  
使大兵攻克一處糧臺即接續一處一切軍需各  
項俱得轉輸迅速均奏入

上諭軍機大臣曰郝碩等奏糧運情形自應如此辦理  
但此次安設糧臺必須每站撥兵護守嚴密巡防並  
應多添護糧夫役小心遞運不宜僅委之背糧人夫  
以致稍有疎虞其應如何酌派兵夫護送之處著郝  
碩劉秉恬留心妥辦並著阿桂富勒渾將應派兵夫

事宜籌酌辦理至現在收復美諾帛噶爾角克等處官兵聲勢壯盛賊番諒不敢潛出滋擾第兵行貴於乘勝直進而各處可通金川路逕甚多則後路最關緊要屢諭富勒渾王進泰二人帶兵駐守此事即係該督提等專責其一應防守事業總須與阿桂隨時聲息相通嚴密防範不可稍存大意再富勒渾奏兵進糧隨軍需迅速轉運一摺所辦甚好即著妥為經理所有各處護糧防後等要務富勒渾務宜督率安

辨

平定兩金川方畧卷八十

欽定四庫全書

平定兩金川方略卷八十一

十一月庚午明亮富德奏言查河南拉約之前地名拉宗官兵十月三十日克取得布申之後即於是夜鼓勇攻克至次日<sub>臣</sub>等相度拉約一帶山梁雖礮卡密排而賊番甫經喪敗其氣已衰且兵力可以施展隨令叅將廣著等分帶官兵往勦另派科瑪帶兵沿河繞過拉約以遏救援來路自午至

申賊番抵禦逾時翻山而遁乘勢追殺甚多對策  
爾丹色木徒壁之上即為邦申賊番佔據山巔下  
瞰我軍動靜必須一併攻克以佔地利至初二日  
派令三寶及前鋒參領巴克坦布等分路帶兵會  
攻將至礮卡賊衆旋即棄去惟河南之宅壘三寨  
因各處失守賊番退回聚集鎗石如雨而下官兵  
一時不能得手查守備張芝元辦理夷務已久為  
番人素所信服即令親往招諭許以不殺並將譯



諭轉付安布木安本令其親信阿囊潛往賊寨曉  
示小金川番衆其時天已昏黑各山鎗石俱不見  
放各寨內恐尚有金川賊衆把持正可乘其猶豫  
未定之時連夜發兵襲取因密令都司鄂輝趕搭  
木橋即派奎林等選帶奮勇兵丁潛行過河蟻附  
而上至四鼓均已到齊四面吶喊進攻賊番慌亂  
逃竄被我兵擊斃二十餘名阿囊當將拉約番衆  
阿塔安明等七戶人口引出投降

臣等親提到營

遵奉

恩旨准其赦免但未便仍在原地居住隨將各番家  
口俱發交明正土司編管其阿塔等七名本係安  
布木安本名下屬番即令隨營打仗既可使未順  
各番共生退悔之心并使逆酋自疑其衆互相離  
貳即金川派兵協守心消沮必有望風自潰之勢  
臣等現將所得地方酌量派兵防範一面鼓勵衆  
兵設法進取再守備張芝元前於攻奪喇嘛寺日

寨碉座首先率衆進撲並指麾各土兵奮勉殺賊  
至攻佔得里策爾丹色木復乘勝奪取南山梁拉  
約碉卡又千總張純搶取日寨四碉突前殺賊  
得有重傷均屬勇往出力可否仰懇

聖恩賞戴孔雀翎奏入

上諭內閣曰明亮等奏攻克德布甲後乘勝收復各地  
方所有查明出力之將弁兵丁等即著交部查照  
議叙至所奏守備張芝元於攻奪喇嘛寺日寨碉

座時率先攻撲指麾殺賊至攻佔得里策爾丹色木等處並乘賊奪取南山梁拉約碉卡實屬奮勇出力張芝元著加恩賞戴孔雀翎並賞給扎敦巴圖魯名號仍照例賞銀一百兩又千總張純搶取日寨四碉突前殺賊得有重傷亦屬出力可嘉張純著加恩以守備用遇缺即補並著賞戴孔雀翎以示獎勵

上諭軍機大臣曰明亮等奏連日乘勝進攻收復情形

已有旨諭部查照議叙矣明亮發摺時尚未知阿  
桂已得美諾計賊衆聞知阿桂克復美諾之信僧  
格宗一帶賊衆必難復守諒皆棄而潰去此時西  
南兩路官軍自己會合收復小金川之易朕早籌  
度及之屢經傳諭但不意其迅速若此寔由派添  
滿洲勁旅勇銳百倍於前綠營見之亦各知愧勵  
效法是以所向克捷其先聲所播自足使金川賊  
衆聞而膽寒今分路進攻金川必當選派八旗精

銳佐以綠營屯土各兵乘此新勝銳氣多殲賊衆  
使賊益瞻喪心摧攻之更易為力但臨陣時必須  
量度地勢夷險計我兵一戰即可大得便利方與  
接仗或設伏誘賊截殺皆可參酌用之設或所攻  
道路未能即時深入或碉堅徑險人力難以驟施  
則斷不可益浪輕進為無益撲礮之舉將軍等務  
當詳慎妥善佇聽提督

臣等謹案西南兩路官兵同日進剿仰荷

聖主威福未及浹美諾全行克復皆由稟奉

睿謨分道並舉使賊首首尾不能相顧是以迅速奏功  
復以兵貴神速當乘此先聲鼓銳直前擒渠掃  
穴而於審度地利及設伏誘截臨陣機宜再三  
告誡備極周詳凡師行鞫鈴綜括靡遺即日後掃蕩金  
川全局已無一不具於

宵旰間矣

辛未

上諭軍機大臣曰五岱在軍營歷練已久於攻戰機宜尚能熟悉著授為領隊大臣遇有攻剿之處豐昇額務虛衷商酌而行以期妥善

壬申文綬奏言將軍阿桂等於十月二十九日進攻至十一月初四日收復阿喀木雅鄂克什明郭宗美諾等處大兵深入一切夫馬糧餉安設臺站均關緊要臣前與督臣富勒渾彼此扎商預為籌定西路日隆達木巴宗等處糧米火藥等項均宜



克裕轉運因過兵時差務較繁每站俱添正佐等  
官幫辦又於額設塘馬之外備馬二百匹分安五  
站其人夫於每站原安四百名之外各添夫二百  
名俟兵進站添即以前項官員夫馬抽撥應用今  
兵已過竣通融調派可無貽悞惟是大兵已抵美  
諾乘勝窺入站數愈多或恐不敷分派臣已飭就  
近州縣僱夫二千名星夜解赴美諾聽用俟兩路  
會合仍可將章谷爐城一帶站夫隨時酌調以供

輓運不致遲悞奏入

上嘉之

癸酉明亮富德奏言

臣

等於十一月初三四等日

派奎林阿爾都等帶兵奪取河南之達什思巴爾

派和隆武三寶等帶兵奪取河北之扎覺木邦甲

德烏塘得功普斯噶頂拉察喇嘛寺等處碉寨自

領隊大臣以至兵丁乘勝前進直抵僧格宗

臣

明

亮富德又於各營抽兵數百接應奪佔山梁高處

向下壓擊而山下官兵又奮勇向上夾攻於初五日戌刻遂將僧格宗碉寨俱行攻克所獲米一千餘石火藥五十餘包俱入官充用至初六日申刻將軍阿桂差番人二名持札前來稱西路自二十九日進兵至初三日已克復美諾現今河南舍壘三寨及河北彭魯爾八寨之人俱經歸順等語臣等當即派奎林三寶等帶前赴美諾會合至南路從河北翁古爾壘以至僧格宗通金川之路甚多

應須歷練領隊大臣等留兵駐守而河南一帶亦多通汗牛寨落臣等屢使人招諭尚未投順此等通賊道路亦應一併固守統俟布置妥協即親赴美諾與將軍阿桂會籌勦滅金川之計奏入

上諭內閣曰明亮等奏大兵克復僧格宗等處並接牧復美諾之信即統兵前往會合等語所辦甚合幾宜此次收復僧格宗奮勉官兵等即著查明交部并案議叙

上諭軍機大臣曰阿桂克復美諾等處聲勢甚盛其底  
木達布朗郭宗等處想亦可即時收復是小金川全  
局已定自當迅速分路攻勦金川且我兵連勝之後  
人皆鼓勇直前正當乘其銳氣相機直進或金川賊  
衆倉猝未及堅拒或見我兵所向克捷懾我先聲不  
能如前固守官軍竟得乘勢深入亦未可知且番地  
冬三月尚有晴霽之日交春以後雨雪漸多至夏不  
止阿桂等進兵趁此天氣晴暖進攻更易為力即我

滿洲勁旅亦當乘其新勝用之其勇銳自可一以當  
百實為事半功倍即綠營兵衆離家遠調誰不願成  
功速還久則心懈而氣亦餒所謂兵貴神速也各路  
將軍等均當深體朕意上緊趕辦佇望捷音至明亮  
等所稱已得各處俱派妥幹之員駐守等語自應如  
此籌辦即阿桂處有應派兵防禦者令富勒渾王進  
泰帶領妥辦已屢降諭旨阿桂等即當遵照籌酌而  
行

甲戌阿桂色布騰巴爾珠爾奏言竊查海蘭察等帶兵八千由別斯滿一路直壓帛噶爾角克聲勢已盛臣等又於富興烏什哈達等所帶兵三千內派撥二千餘名令富興等帶領前往接應並札知海蘭察等即由帛噶爾角克進取岱多喇嘛寺旋據海蘭察等報稱查看帛噶爾角克東西山梁石卡九座俱有賊番據守隨於初三日寅刻分兵三路奮迅進攻殺死賊番十餘名餘皆奔竄將帛噶

爾角克一帶寨落全行攻克所有緊要處所分兵駐守其普帶兵攻打之色布色爾山梁亦於初二日黎明擊敗賊酋攻克碉座十餘處惟是官兵自上北山以來夜寒風冽因潛行進攻俱未攜帶帳房亦不令其舉火及至攻克帛噶爾角克業經七日七夜攀崖越險行走打仗畧無少暇海蘭察等於帛噶爾角克稍歇兵力即率兵進攻又據報稱我兵由帛噶爾角克進據岱多喇嘛寺木波寨等



處聞簇拉角克山梁有賊把守我兵即由上下兩路分兵攻取行至布朗郭宗附近之處賊番亦從上下兩路來迎我兵奮勇直前殺賊二十餘名將布朗郭宗底本達攻取先後收獲糧石約共四千餘斛等語至明亮富德等南路官兵於初四日尚無信息而<sub>臣</sub>等中路之兵現在不滿六千量於美諾附近緊要隘口分撥安卡即令降番持清字公文前往南路通知明亮並即於初五日夜派副都

統福珠里總兵成德等帶兵迅往接濟初六日前  
至舍壘據報該處番民先已投順初七日據派往  
之降番持明亮等回扎內稱本月初六日已將僧  
格宗等處克復俟分防後路事畢即馳赴美諾同  
日並據福珠里成德等報稱已在鳩瑪爾里地方  
與明亮等前哨之兵會合是小金川地方大局已  
定雖尚有大板昭瑪爾當等碉寨現今海蘭察帶  
兵往勦<sub>臣</sub>等一與明亮富德會合即將進勦金川

事宜悉心籌酌議定道路另行馳

奏至已降復叛之番人本不可留但若盡法處治不獨小金川人斷絕來歸之念恐金川賊衆益堅死守若任其散處則進兵以後又不免有後顧之虞臣等再三籌酌此時除打仗拏獲及查出情節可惡者即時誅戮外其餘脅從之人將眷屬移往各土司地方存住精壯番民仍令隨營打仗出力並飭令各土司嚴加約束留心查察倘稍有踪跡可

疑隨時嚴辦至美諾官寨美及都喇嘛寺昨已焚  
燒其各處大寨並飭帶兵將弁一并焚燬其陸續  
移往別處及逃往金川叛番之空寨將來亦均漸  
次焚燒以絕此後賊番窺覷容俟辦理奏

聞此次師行奮迅其人夫糧站萬不能趕上安設今明  
郭宗美諾等處節次皆得米口而帛噶爾角克等  
處獲米尤多<sub>臣</sub>等即以此項散給官兵作為口糧  
頗足以濟輓輸之不及至所得大砲四位前已

奏明外其劈山砲前後共一十六位火鳥鎗一百六十餘桿火藥約一萬四千餘斤火繩約二千七百餘盤鎗子約十餘萬大小砲子五百餘個並矛刀藤牌鉛鐵等項均令隨營備用奏入

上諭軍機大臣曰現在小金川均經收復自當乘勝進攻但進兵應用何路至今未據阿桂奏到前日曾計及美卧溝與木果木之後皆係賊人潛出之路或由彼進攻出其不意似為便利曾經諭商阿桂令其

熟籌妥辦阿桂接奉前旨自必斟酌辦理但各路地利寬窄及賊番守拒虛實均不可不因其形勢相機進取著傳諭阿桂一面籌度速辦一面奏聞再攻勦金川未必能如克復小金川之易或因官兵所向克捷賊番懾我先聲不復似前此之固守官兵仍可乘勝進取亦未可知但恐賊番詭詐多端見新添滿洲勁旅勇銳百倍不敢撓我之鋒官兵所至賊留空碣遁去讓我深入賊乃逞其故智從後抄襲所關甚為

緊要阿桂等各路進攻金川如遇有賊衆棄碉奔潰之處察其情涉誑誘者當慎之又慎整隊以次續進使後路仍有策應之兵方為妥善再明亮等在南路連次得勝海蘭察等在西路亦甚奮勉均屬可嘉明亮富德奎林海蘭察普爾普均著賞給御用黑狐冠各一頂隨軍報發去

同日富勒渾奏言竊查將軍阿桂三路進兵數日之間掃蕩賊巢移營美諾而北山梁之兵復經收

復帛噶爾角克進取布朗郭宗等處大兵乘勝長  
驅各路需糧自應隨軍轉運以資接濟臣飛飭日  
隆達木巴宗兩處糧員將指運該站之米按站加  
給腳價令原夫直送軍營並將該站存積之糧一  
體趲運惟查達木巴宗距美諾一百餘里當此兵  
行神速迫不及待之時所有奏摺文報糧米軍火  
等項均關緊要急須安設臺站派撥夫馬俾得轉  
遞無停茲據建昌道白瀛稟稱資哩鄂克什明郭



宗美諾本係舊時站所今將軍已抵美諾其資哩  
等三處應各安夫六百名馬十六匹美諾一站現  
駐大營且須分送各處軍糧並為西南兩路總匯  
之地應安夫一千二百名馬三十匹以備移營添  
站之用除砲局本係隨營安設尚可於此項一千  
二百名內酌量撥用惟炭廠設於欽乂地方距營  
五站隨營長夫斷難分派應另安夫三百名專令  
樵採燒炭運赴砲局

臣查資哩等處臺站自應按

照舊定章程妥為安設但此項夫馬需用甚多若  
由省城調派未免輾轉稽時查自桃關至日隆各  
站前因京兵及東三省官兵過境曾經臣

奏明口外各站於額設四百名夫之外每站添夫二  
百名以備應付今各兵將次過竣正當裁撤隨飭  
各站員即將前項加增站夫盡行抽撤並委委員  
管押交建昌道白瀛均勻派撥較為便捷設夫數  
或有未敷復飭軍需局將原路西路未到之夫嚴

加催趲以便添補至馬匹一項先經臣具

奏於西路之卧龍關向陽坪每站安馬四十匹以備  
緊要差務亦分飭各站員將存留之馬每站先調  
撥二十匹分交各站用資馳遞其管理糧務及遞  
送

奏報員弁業俱就近派委各司其事不致稍有遲悞  
奏入

上諭軍機大臣曰富勒渾奏籌設臺站抽撥馬夫所辦

甚好大兵攻克美諾之後布朗郭宗等處現又全行  
收復即日乘勝深入糧運防護最關緊要前經傳諭  
富勒渾等加撥兵夫嚴密巡防因思運糧夫役為數  
甚多自不乏年力精壯之人若於其中揀選強壯夫  
練役習器械護行如州縣之設立民壯亦足以資捍  
衛著傳諭富勒渾除各臺派兵防護外仍飭各站員  
於派撥糧夫時慎加選擇並曉諭各夫現在官兵聲  
勢壯盛尅日掃蕩賊巢賊匪斷不敢復出滋擾即遇

有小賊正可合力擊殺轉可得功授賞切勿驚惶退  
去致干罪戾如此明切剴諭各夫役自能氣壯弗致  
疎虞

臣等謹按軍行轉饟最為要務業經屢奉

諭旨加撥兵夫防護嚴密茲當收復美諾小金川全部  
已定長驅乘勝即日進擣賊巢糧運事宜尤須  
加意慎重

皇上於各臺站兵防而外復

命選練強壯夫役捍衛遘行俾勇者咸思有奮怯者恃以無虞即遇有一二匪賊正可合力攻殺得功受賞軍聲藉以益壯而立法尤為盡善矣

同日郝碩劉秉恬奏言竊查大兵於本月初四日抵美諾後臣郝碩在美諾董率糧員就近料理一切臣劉秉恬即連夜趕至達木巴宗趨辦糧運連日以來多撥內地人夫并添僱蠻夫及貿易人等直運美諾其運到之商米按站給與價值即令商

人原僱之夫運往現已運出米一千四百餘石美諾軍營除支放外尚存米數百石並有搜獲米二百餘石自可無悞查美諾現係官兵總滙之處支食浩繁且南路運米腳價倍貴於西路兩路一通亦應改由美諾轉運此時美諾之米自應上緊趕辦俟將來可以緩運時再行酌量暫緩至底本達布朗郭宗一帶官兵口糧須自明郭宗分運向北前往亦約有百餘里今我兵到彼業已搜獲米二

千餘石足敷八千餘兵一月之食目下此路軍糧  
自可稍緩臣等仍查詢兵行情形并核算官兵數  
目俟應接濟時次第轉運奏入

上嘉之

平定兩金川方略卷八十一



欽定四庫全書

平定兩金川方略卷八十二

十一月丁丑豐昇額舒常奏言臣等察看賊情自  
攻毀善壩山梁碉卡後達爾圖賊衆防守愈嚴雖  
此時士氣奮揚然攻取日久加以賊番增防若照舊  
攻擊實屬有名無實是以詳細熟籌未肯輕舉茲  
奉

上諭將派赴日隆之楚兵二千內再撥一千赴宜喜與

昨撥鄂寶兵一千俱交臣豐昇額帶領為丹壩一路進勦之用臣等籌計西南兩路於收復小金川之前楚兵已到營不獨丹壩進勦足敷應用而綽斯甲布一路亦可無虞惟是分兵丹壩尚需時日臣等此時自應設法盡力牽綴以期各路收復小金川之兵得以乘時深入現今於達爾圖日旁附近處訪覓間路察看虛實為一舉制勝之計奏入上諭軍機大臣曰豐昇額等所奏尚未知阿桂收復小

金川之信昨因阿桂等將小金川地方全行克復已  
諭令酌定進兵之路迅速進攻并諭令豐昇額即同  
五岱等帶兵前往丹壩現又諭文綬於楚兵經行各  
站沿途飛檄傳催計楚兵於十一月初一二等日自  
宜昌起程計期早已入川再行催趨行程自更迅捷  
戊寅阿桂色布騰巴爾珠爾奏言查大兵克復底  
木達布朗郭宗等處附近各寨番民陸續來投惟  
東南山溝內達扎寨頭人阿枯魯藏匿碉內拒守

因即派兵前往圍勦將阿枯魯殺死並獲跟隨活口亦俱正法所有賊人家口賞給屯練土兵其大板昭瑪爾當等處正在派兵往勦據穆塔爾安篤爾報稱大板昭瑪爾當曾頭溝各寨番人內皆有我等親戚今聞大兵將至親赴軍營懇請投降我等已暫為安頓其有進入林箐者現在搜查至金川逆賊早已聞風遠竄臣等酌派漢土官兵前往逐一清查辦理又據木坪土司甲爾參納木卡稟

稱遵諭差人至汗牛各寨據番民等稱自去年投順以來承受

天朝恩典極為深厚今年兩金川滋擾後路我等自守巢穴總不敢附和今蒙差人來諭斷不敢稍有二心土司現在親赴彼處料理等語查從美諾至大板昭曾頭溝計程二百四五十里此一帶地方遼廓番寨甚多今大兵所到即已望風丐命而汗牛各寨又復歸誠恐後所有收復小金川之局業經

竣事奏入

上嘉之

同日阿桂色布騰巴爾珠爾又奏言臣等查附近大板昭之凱立葉及谷噶兩路雖距南路章谷等處稍遠但前據通事稟稱該處道路尚可進兵是以節次奏

聞並蒙

皇上指示若可作為正路令臣阿桂由此而進彼時該

處地方悉為賊據未可遣人往探今收復之後臣等已派妥密能事之人前往密看山川形勢果否易於進取俟其查探回時另行

奏覆奏入

上諭軍機大臣曰阿桂奏收復大板昭曾頭溝暨汗牛番人降順小金川全境蕩平又籌降番事宜所辦甚妥但兵貴神速官軍早進一日賊人守禦尚未甚堅或能攻其無備乘勢得手亦未可定至凱立葉谷噶

等處與大板昭相近阿桂在日隆未收小金川之前  
自難探其詳細今大板昭既已克復則詢訪尤易得  
實亦當及早查明如可作為正路阿桂即於此進兵  
至收復小金川所向克捷實由新添滿洲勁旅聲勢  
甚盛其先聲已足令賊佈讐今阿桂等統兵進勦金  
川必擇形勢便利可以打仗得手之處將賊衆多加  
殲戮使皆望風喪膽各路攻勦自更易為力

辛巳鄂寶奏言竊

臣接奉



諭旨令駐扎丹東往來經理糧運兼防後路適布政使  
顏希深亦已來抵覺木交臣正將此路一切糧運  
並防範事宜商同顏希深妥酌籌辦茲於本月十  
一日接准將軍阿桂等咨稱現今奏請令桂林率  
同按察使李世傑專辦南路軍糧而令臣鄂寶專  
辦綽斯甲布丹壩糧運是三路各有專辦大員於  
軍儲防守均有裨益但桂林既經督辦南路糧運  
其南路之丹東一帶似可就近照應若臣駐扎丹

東與綽斯甲布丹壩相距迢遙綽斯甲布後路一帶甚闊緊要鞭長莫及而顏希深甫經抵營於賊番出沒及道路情形未能深悉臣若驟赴丹東殊多顧慮可否令桂林就近兼管丹東之處伏祈

訓示奏入

上從之

十二月丙戌

上諭內閣曰海蘭察等前因不能駐守美諾經阿桂查

奏將伊等革職留任其咎固屬應得此次收復小金川均能奮勉出力各著勞績著加恩將海蘭察富興烏什哈達成德富紳海祿所有革職留任之案准其開復其各本任應得養廉分例並著照舊支給

丁亥阿桂明亮色布騰巴爾珠爾奏言此時進剿金川所有分路進兵之處臣等久經留心體訪今公同酌議查功噶爾拉及木果木兩處山高雪大氣候惡劣峰巒險削賊人蜩卡如林當噶爾拉雖

有可通之路自大兵撤後防範益密誠如

聖諭從此三處進兵實為無益惟凱立葉一處詢據土人稱可以進兵自大兵克復瑪爾當大板昭後已遣妥人前往密探其谷噶地方與凱立葉相近將來或派兵並進或在兩路中擇一路作為正路一路酌量揚威臨時再行辦理至臣明亮南路查有河北之馬奈馬爾邦等處本係乾隆十二三年進兵之路又其地係巴旺布拉克底之邊界後路尚

可放心自應於此處進勦惟是南路官兵移在馬  
柰馬爾邦西路官兵移在凱立葉等處則自東北  
抵西南相距遼遠其間緊要隘口已不下十餘處  
而重崖深箐可通之小路更多若於此一帶均設  
糧臺驛站必須分兵據守而自巴朗拉日隆關以  
至美諾各臺站亦尚須多兵防範計非八千以上  
不可且非熟於形勢善於帶兵之將領數人不足  
以資控制今總計西南兩路兵力不過四萬有餘

臣阿桂等即於凱立葉谷噶等處進兵而自底木達以至大板昭及瑪爾當等各隘口仍須派兵數千駐守將來或欲再分一路已屬不敷而臣明亮等即從馬柰馬爾邦進攻其後路如章谷卡了達烏等處須兵防範亦多此兩路中間橫亘五百餘里各處留防分去八九千人則每路僅存一萬五六千人又各去附近應防要隘之兵則所存兵不過萬餘僅能與賊相持斷不能奮迅攻進而兩路

能事將弁不過數員置之駐守之地則帶兵打仗  
轉至無人可用臣阿桂伏思小金川全境番人既  
均內徙寨落已悉焚燒此一帶地方盡為荒山空  
壤美諾亦成廢地即不設兵駐守其小金川之竄  
在金川者亦難再出佔據而金川正當分路勦殺  
之時亦斷不能分人再佔小金川之地若使小金  
川人仍回本地則又分減金川螳臂之力臣等此  
時惟期後路稍省一兵即多增一進勦之用臣等

悉心籌議自美諾西至僧格宗東至大板昭三四  
百里內竟可無須大兵駐守此時達木巴宗日隆  
等處糧貯頗多尚須多兵駐守一俟糧石運完彼  
時鄂克什路頂宗等處只須留兵三千以資護衛  
更可餘出多兵以為攻勦之用至臣明亮處僧格  
宗一帶亦可無庸駐兵惟章谷所關緊要請將所  
餘之楚兵一千調往分駐其凱立葉谷噶等處距  
三雜谷本近所有官兵糧運將來即從三雜谷運



往較之仍由西路卧龍關而至美諾由美諾而至  
底木達布朗郭宗前抵凱立葉谷噶等處程途較  
近脚價亦省且三雜谷一帶自去年以來臺站久  
經安設今不過畧添數站並每站酌添人夫初不  
煩另起爐竈而西自卡了東至底木達布朗郭宗  
中間舊時所設糧臺驛站悉可裁減至達木巴宗  
日隆一帶存糧三萬餘石較之由打箭爐運出之  
糧脚價本輕今即令總理糧務司道催趲人夫由

美諾撥運章谷一帶接濟南路軍儲既為捷便且多節省其餘酌從別斯滿溝運到底木達等處以供支給至底木達布朗郭宗與谷噶凱立葉等處相距百餘里今海蘭察等尚駐底木達等處官兵從何路進勦賊人無從揣測臣阿桂等部署一定即連前往底木達帶兵前進仰仗

皇上威福更可易於攻克臣明亮等亦同時並舉使其猝不及防奏入

上諭曰爾等所議甚是不入虎穴不得虎子勉之惟俟捷音速至

同日阿桂又奏言川省各路軍營近蒙

皇上派給滿漢各兵合以舊有之兵及各後路防護糧臺統計七萬兵數不為不多其西路官兵亦有二萬四千餘人但此時美諾一帶三四百里之內即不設兵駐守亦須分兵三四千留防鄂克什地方而附近凱立葉谷噶等處如底木達大板昭瑪爾

當各隘又須分兵駐守是此路進剿之兵僅敷一路之用若再有酌量情形分頭入之處即屬不敷查漢軍烏鎗火器較勝綠營如蒙

俞允酌派四千此項漢軍所需火藥箭枝均可無庸攜帶則行走輕便且漢軍本能步行如直隸山西陝西等處不過酌給車輛川省則酌給人夫供運行裝沿途亦無多費

同日阿桂色布騰巴爾珠爾又奏言臣等分撥小

金川降番如屯練及瓦寺土司原有頭人土兵隨營打仗即令其派人將婦女老幼一并押解而鄂克什土司亦經親自領回既省官兵解送之勞且以番人管解番人更無虞其竄逸至於高碉大寨若用人力削平既需多兵且稽時日今乘冬令乾燥舉火焚燒立時可燼其火力所不到者始令兵丁拆毀亦易於摧枯拉朽此時河北之小金川番人既已遷徙將盡其在河南者又現在分別辦理

總使進兵後金川賊人無從勾結而脅令竄入之  
小金川番人舊時莊稼盡化荒蕪既無口糧可覓  
又無碉卡可依斷不能潛為盤踞後路分防較為  
省力此次西路降番除發交瓦寺土司六百七十  
餘名口鄂克什土司二百餘名口外其餘撥往雜  
谷腦等處令屯弁管轄者亦已撥往五百十九名  
口令於二道橋以內附近閒空地地方妥為安置該  
番移往時各自攜帶家口不敢稍有桀驁至臣阿

桂在南路時收復宅壘拉約等處降番一百餘名  
前經安插巴旺布拉克底並明正地方今仍令照  
常居住臣明亮等新收之宅壘鳩寨一百五十餘  
名亦均交各土司頭人分別安置以資管束均奏  
入

上諭軍機大臣曰阿桂議於谷噶凱立葉及馬柰馬爾  
邦兩路籌辦糧運並防範後路之處俱尚合宜惟稱  
小金川全境番人既均內徙寨落焚燒即不設兵駐

守亦難再行佔據所言殊未當理阿桂之意不過以後路稍省一兵即可多增一進勦之用所見者小而所昧者大當今進勦金川行軍機要所關甚重內外諸臣熟悉軍旅實無出阿桂之右何於此等最要節目疎畧若此小金川密邇金川地關扼要昨歲官兵攻打半年始行政得今歲則旬日之間悉行收復其勢又屬太易前此惟恐阿桂等意存矜滿曾屢降旨令其加意謹飭初不料其將美諾一路忽不經意至



此況我軍此次因添滿洲勁旅所向克捷聲勢甚盛  
正當將克復之小金川全境妥為安置使官兵藉以  
為根基賊酋稍有所畏懼所謂得寸則寸前此西隆  
用兵原係如此辦理阿桂豈忽而忘之況兩將軍分  
路進兵中間正當聲息相通方為有益若有阻隔亦  
多未便阿桂何全未籌度及此耶至豐昇額帶兵由  
丹壩一路進攻固亦備用之一策但現在阿桂所進  
之谷噶凱立葉俱係通勒烏圍之路相距丹壩不遠

阿桂到後或酌量該處有可進情形不妨酌調豐昇額速赴谷噶等處籌辦均係國家公務原不庸稍分畛域也

上又諭軍機大臣曰據阿桂等奏分路進攻金川請扎調漢軍官兵四千協勦等語阿桂等現已進勦金川所需添兵一節若向遠省撥調未免鞭長莫及惟荊州駐防及湖北各據營入川較近尚可量為添撥著傳諭陳輝祖即速於荊州駐防兵內再調一千名令

副都統書明阿帶往所有料理軍行事宜悉照前此  
綽和諾所辦妥協經理俾令迅速進行并於湖北附  
近川省綠營兵內抽撥一千名料理前往其帶兵將  
領該省此際恐未必有出色之總兵大員或可於副  
叅內揀派熟諳帶兵之人即令其統領趨行仍飭沿  
途地方官一體妥速預備毋致遲滯著傳令陳輝祖  
並阿桂知之

戊子

上諭軍機大臣曰小金川一帶前諭富勒渾王進泰在  
彼駐守今美諾一帶綿亘四五百里而僧格宗明郭  
宗皆其扼要之地富勒渾王進泰或各擇一處駐守  
或於兩處選派妥員分駐兩人同駐美諾設法聲援  
方為妥協富勒渾等既在美諾防駐需兵亦不可少  
此時阿桂軍營之兵難以再為分派富勒渾王進泰  
當於巴朗拉等處防兵內量為抽撥或於成都駐防  
川省綠營內選湊二千餘人調赴美諾應用較之外

省調撥尤為便捷而於防守之道亦可隨時應手富勒渾等當妥協為之

己丑富勒渾王進泰奏言將軍阿桂等現在進勦金川雖尚未經指定後路地方臣等就現在所存之兵分布防守務期嚴密其小金川降番眷屬節次賞給九寺土司人口衆多自應加意防範查後路鄂克什達木巴宗日隆巴朗拉等處僅各存兵一二百名實難再撥臣等酌於省城存營兵內調派

一二百名駐扎草坡一帶以資彈壓并委派永寧道蘇爾通阿親往草坡飭令該土司將所領降番妥為安插仍嚴加管束毋致別滋事釁至維州打箭爐靈關以外即係三雜谷明正木坪及各土司地方該土司等均有分領降番亦須設兵查察臣等現飭松潘鎮泰寧協黎雅營該管鎮將就近酌派弁兵實力巡防再查此時後路兵力雖覺稍單但將軍阿桂現在美諾駐扎大兵聲勢聯絡可免

疎虞將來酌定何路進攻臣等亦即相機前進以備策應

富勒渾又奏言大兵收復美諾已於布朗郭宗等處搜獲米二千餘石但小金川各碉寨零星散處此外保無存匿之糧臣隨派員前往布朗郭宗一帶逐細清查茲據查明各處原報搜獲並續經查出米石砲位軍械臣即飭令將米糧留貯以備布朗郭宗等處官兵支食至南路之僧格宗據報搜

獲米一千三百餘石足支大兵糧餉宜委妥員于  
內地運貯臣在美諾時面飭臬司李世傑親往查  
辦並令將南路各碉寨逐一查明毋稍隱匿遺漏  
現在日隆達木巴宗兩處存糧三萬餘石儲積已  
極充盈不但足供西路之需併可通融接濟南路  
之用其布朗郭宗一帶現駐官兵為餘所有破碉  
帛噶爾角克喇嘛寺等處臺站已委官率兵鎮壓  
由美諾前往南路之科多處糗糧器械等具足以



備大兵分路進攻或將現設之臺抽撤改設或另須加添臺站所需員弁臣已陸續調到應用夫馬亦現由後路酌量抽撥一經將軍等移營前進隨後安設已足通融辦理均奏入

上諭軍機大臣曰富勒渾王進泰駐守美諾一帶其事最為重大昨已諭令富勒渾等或於僧格宗明郭宗各佔一處或於此兩處另派勇幹之員防駐而彼二人酌量於美諾等適中之處控馭彈壓方為妥善至

該處需用之兵昨雖已添派荊州駐防湖北綠營各一千但計其到營尚早富勒渾等現在所需防守之兵為數既不能少而阿桂等所有征兵又難於分撥昨諭令於各處糧站及成都駐防川省綠營內選撥二三千名備用今據富勒渾奏省城所留之兵僅能再撥一二百名而鄂克什各寨現有之兵不及八百名是其應添兵數大須籌畫著富勒渾王進泰悉心妥酌應作何抽調應用之處迅即覆奏總期防守嚴

密即畧增小費亦所不惜也



平定兩金川方畧卷八十二